

Consei de Publiche istruzion. «L'ûs veicolâr de marilenghe a scuele al è bon par imparâ»

TE SMIRE DAI TARIZADORS DE LEÇ sul furlan al è ancje l'us veicolâr de marilenghe. Roberto Dominici, dal Comitât pe autonomie e il rilanc dal Friûl, al à marcât che al è previodût de leç 482 e che la leç regionâl e difint la autonomie scolastiche. Cun di plui, fin il Consei nazionâl de Publiche istruzion, intun document dal Jugn dal 1989, al marcave trop che al fos «positif e didaticamentri oportun che la lenghe mari minoritarie e sedi doprade te scuele materne e elementâr tant che strument par miorâ i aprendiments». Al raccomandave al Ministri di sigurâ a «ducj i citadins apartignints aes minorancis linguisticis il plen svilup des capacitâts di esprimisi te lenghe mari, sedi te forme fevelade sedi te forme scrite» e, ai citadins che a fevelin talian e a stan in zonis dulà che a vivin minorancis linguisticis, al raccomandave «une suficiente cognossince de lenghe de minorance dulà che a vivin adun».

La incostituzionalità de leç e vignarès po, a sintî lis criticis, ancje dal mecanisim che la leç e previôt pai gjenitôrs che a àn di declarâ se a intindin valêsi o no dal insegnament de marilenghe pai lôr fis. Mecanisim sostignût di furlaniscj e autonomiscj «par difindi la dignitât dal furlan» e «par no jemplâ lis scuclis di domandis».

A rivuart de cuintrioposizion jenfri dirits individui e colettifs e chê jenfri minorancis linguisticis e nazionâls, Carlo Puppo, dal Comitât 482, al à sclârît che «propit la Costituzione de Republiche taliane e dîs a clâr, bielzà tal so secont articul, che i dirits a van garantîts ai citadins ancje tes "formazions sociâls" là che a son dentri» e che «lis leçs talianis a fevelin dome di minorancis linguisticis».

A pro de leç si è declarât il retôr de Universitât dal Friûl, Furio Honsell, che le e à definide «buine», parcè che e difint e e promôf la lenghe furlane «cun spirit di grande tolerance, tal rispjet de autonomie scolastiche, dai comuns...». Honsell



Te foto: di çampe, Arnaldo Baracetti e Furio Honsell.

al à insistît su la impuartance dal furlan inte scuele tant che lenghe insegnade e tant che lenghe veicolâr. «Vê la fortune di passâ di une lenghe a une altre al è un patrimoni di conservâ e rinovâ. Il plurilinguism – al à dit – al è une grande oportunitât. Cui che al vif intun contest plurilingâl, fin di frut, al à un vantaç dal pont di viste dal aprendiment des lenghis».

Dilunc de conference stampe al è stât po domandât che la programazion sperimentâl di trasmissions radiotelevisivis par furlan su la Rai, che e varès di partî in curt, e diventî stabile. «Te Convenzion pes trasmissions par sloven e italian tra Consei dai ministris e Rai, di rinovâ, a àn di jentrâ ancje chês in marilenghe». Ai parlamentârs al è stât, alfin, raccomandât che a stedin atents par che tal decret «Milproroghis» al vegni aprovât l'articul che al torne a finanziâ la leç 482 e par che i bêçs pes universitâts a premiedin il merit, duncje Udin e cjapi ce che i tocje.

SERVIZIS DI **ERIKA ADAMI**